



ՀԱՅԱՍՏԱՆ

Հայաստանը չի պատրաստվում քննարկել այսպես կոչված «Չանգեզուրի միջանցքի» հարց. Միեր Գրիգորյան

2 ժամ առաջ

Աստղիկ Բեդեյան

Մոսկվայում՝ փոխվարչապետերի հանդիպմանը Հայաստանը չի պատրաստվում քննարկել այսպես կոչված «Չանգեզուրի միջանցքի» հարց, եթե կասկածի տակ առնվի Հայաստանի ինքնիշխանությունը ճանապարհի նկատմամբ, «Ազատության» հարցին ի պատասխան այսօր հայտարարում էր փոխվարչապետ Միեր Գրիգորյանը: Տարածաշրջանային ապաշրջափակման հարցով Երևանի բանակցողը հենց նա է:

«Մենք անվերջ հայտարարել ենք, որ դա կարմիր գիծ է, չի քննարկվելու նման հարց: Ես չեմ կարծում, որ տվյալ պարագայում կկազմակերպվեր եռակողմ հանդիպում և նորից այդ հարցը կբարձրացվեր, որովհետև առնվազն դա անիմաստ է, որովհետև մենք չենք քննարկի նման հարց», - ընդգծեց Գրիգորյանը:



ԿԱՐԴԱՑԵՔ ՆԱԵՎ

Մոսկվայում Փաշինյանի ու Ալիևի միջև բանավեճ սկսվեց

Ալիևի հայտարարություններն ու վարչապետ Փաշինյանի մոսկովյան հակադարձումները արդյոք նշանակո՞ւմ են, որ Ադրբեջանը շարունակում է պահանջել «Չանգեզուրի միջանցք», ճշտող հարցին փոխվարչապետն արձագանքեց՝ նման քննարկումը բացառված է: Անցած շաբաթ Մոսկվայում «Չանգեզուրի միջանցքի» մասին Ադրբեջանի նախագահի հայտարարությունը բուռն բանավեճի առիթ տվեց: Վարչապետ Փաշինյանը դա որակեց որպես տարածքային նկրտում Հայաստանի նկատմամբ:

«Միջանցք, շատ դեպքերում հայտարարվել է որպես տրանսպորտային միջանցք, ինչը միջազգային պրակտիկայում ընդունված տերմին է, բայց նաև շատ դեպքերում էլ ընդգծվել է միջանցք, ես կարծում եմ, այլ վերաբերմունք կամ ցանկություն ունենալու տեսանկյունից, և մենք մշտապես այդ երկրորդ տարբերակի հետ կապված տվել ենք մեր պաշտոնական դիրքորոշումը, որ դա ուղղակի բացառված է: Տրանսպորտային հաղորդակցության մասին մենք միշտ պատրաստ ենք խոսել, միջանցքների մասին, եթե ենթադրվում է այդ տերմինի տակ հատուկ ռեժիմ, ոչ, չենք քննարկելու նման հարց», - ասաց Միեր Գրիգորյանը:



ԿԱՐԴԱՑԵՔ ՆԱԵՎ

Փաշինյան-Պուտին-Ալիև եռակողմ հանդիպումն ավարտվել է առանց համատեղ հայտարարության, կողմերը որևէ փաստաթուղթ չեն ստորագրել

Այնուհանդերձ, փոխվարչապետի խոսքից պարզ է դառնում, որ ապաշրջափակման բանակցություններում չկա կոնսենսուս, որ ենթակառուցվածքները լինելու են Հայաստանի իրավագործության ներքո. - «Եթե մենք ֆիզիկապես ենթակառուցվածքների վերականգնման մասին ենք խոսում, շատ նախնական, տևողությունը կարող լինել մոտ 2-3 տարի, այսինքն վերականգնումը: Ո՞նց կընթանան բանակցությունները և ի՞նչ ժամկետներում կհաջողվի կոնսենսուս ունենալ, որպեսզի վերջնականապես ամրագրենք, որ խոսքը վերաբերում է ենթակառուցվածքներին, որոնք լինելու են Հայաստանի իրավագործության ներքո և լինելու են ինքնիշխան Հայաստանի ինքնիշխան ենթակառուցվածքներ, այդ պահից սկսած, կարծում եմ, մնացյալ բոլոր քննարկումները տեխնիկական բնույթի են»:

Հայաստանի, Ադրբեջանի ու Ռուսաստանի ղեկավարների՝ անցած շաբաթվա հանդիպմանը հայտարարվեց, որ Մոսկվայում կհանդիպեն փոխվարչապետերը՝ քննարկելու տրանսպորտային ապաշրջափակումը: Միեր Գրիգորյանը հայտարարում էր, որ այս պահի դրությամբ ծրագրում է գնալ Նիստին, բայց կոնկրետ օր չնշեց, ասաց՝ հանդիպումն այս շաբաթ է նախատեսվում: